

## ALLANNGUUTISSATUT SIUNNERSUUT

uunga

### **Aalisarneq pillugu Inatsisartut inatsisaata allanngortinneqarneranik Inatsisartut inatsisissaattut siunnersuut.**

Pingajussaaneerinninnermut Naalakkersuisunit saqqummiunneqartoq.

#### § 1-imut

**1. Nr. 4-mi § 22a imm. 2 aamma imm. 3-tut ilanngunneqassapput:**

*"Imm. 2. Imm. 1-mi aalajangersagaq namminersortut pisortalluunniit suliffeqarfiutaasa tunisassiorfinnik pioreersunik matuneqartunik tigusinissaannut akornusersuutitut atorneqaqqusaanngilaq. Tamanna aamma atuuppoq tigusinermut atatillugu tunisassiorneq allanngortinniarneqaraangat.*

*Imm. 3. Naalakkersuisut akuersissuteqarnerannut atatillugu susassaqtut tamarmik tusarniaavigineqartassapput."*

*Imm. 2 tamatuma kingorna imm. 4-nngorpoq.*

**2. Nr. 5-imi § 32 imm. 3 ima oqaasertaqassaaq aamma § 32 imm. 4-tut ilanngunneqassaaq:**

*"Imm. 3. Naalakkersuisut suliassani nalinginnaasuni §§ 5, 7, 9, 10, 11, 13, 18, 20, 22 aamma 23-mut tunngasuni Aalisarneq pillugu Siunnersuisoqatigiit tusarniaavigisassavaat.*

*Imm. 4. Apeqqutini imm. 3-mut ilaatinneqartuni kinguartinneqarsinnaanngitsuni Aalisarneq pillugu Siunnersuisoqatigiinni ilaasortanik tamanik allakkatigut Naalakkersuisut tusarniaatitsisinnaapput. Allakkatigut tusarniaaneq atorneqartassaaq siunnersuisoqatigiit isummerniarlutik ataatsimiissinnaanngikkaangata."*

**Aalisarneq pillugu Inatsisartut inatsisaata allanngortinneqarneranik  
Inatsisartut inatsisissaattut siunnersuummut allannguutissatut  
siunnersuummut nassuiaatit.**

*Nr. 1-imut*

Siunnersuutip Inatsisartuni aappassaaneerpeqarnerata kingorna imm. 2 imm. 4-nngortinneqarpoq, imm. 2-mik imm. 3-millu nutaanik ilanngussisoqarluni.

§ 22a imm. 2-mi aalajangersagaq Inatsisartut Aalisarnermut, Piniarnermut Nunalerinermullu Ataatsimiititaliaata 4. maj 2002 isumaliutissiissutaanit aallaaveqarpoq, ataatsimiititaliap kissaatai ilanngunneqarlutik.

Imm. 3-mi nalunaarneqarpoq susassaqartut tamarmik tusarniaavigineqartassasut. Tamatumani ilaatigut eqqarsaatigineqarput nunap immikkoortuani pineqartumi kommunit allat, sulisartut sulisitsisullu kattuffii susassaqartut kiisalu Unammilleqatigiinnermut Ataatsimiititaliaq.

*Nr. 2-mut*

Siunnersuutip Inatsisartuni aappassaaneerpeqarnerata kingorna imm. 3 allanngortinneqarpoq, imm. 4-millu nutaamik ilanngussisoqarluni.

Naalackersuisut suliassani nalinginnaasuni Aalisarneq pillugu Siunnersuisoqatigiinni ilaasortanik ataatsimut imaluunniit ataasiakkaarlugit tusarniaasarnissaannik § 32 imm. 3 aalajangersagaq allanngortinneqarpoq, oqaatsit " ilaasortaat ataatsimut imaluunniit ataasiakkaarlugit" peerneqarlutik. Inatsisartut Aalisarnermut, Piniarnermut Nunalerinermullu Ataatsimiititaliaata isumaliutissiissutaatigut Inatsisartunilu oqallinnermi erserpoq, aalajangersagaq suliassani tamani Aalisarneq pillugu Siunnersuisoqatigiinni ilaasortat tamarmik tusarniarneqartassanersut pillugu paatsungaanernik pilersitsisinnaasoq. Imm. 4-mik nutaamik ilanngussinikkut sukumiinerusumik erseqqissaasoqarpoq. Oqaatigineqassaaq oqaatsimi "ataatsimiissinnaanngikkaata" aamma oqarasuaatikkut ataatsimiissinnaanerit pineqarmata.

Pisortaqarfik maannamut Aalisarneq pillugu Siunnersuisoqatigiinnut ilaasortatut allattoqarfittullu atuussimavoq. Aalisarneq pillugu Siunnersuisoqatigiinni ilaasortat ataatsimeeqataasartullu tamarmik allakkatigut tusarniarneqartarnerat nalinginnaasumik suleriaasiunneqarsimavoq. Pisortaqarfik matuma kingorna Aalisarneq pillugu Siunnersuisoqatigiinnut allattoqarfiuginnassaaq, taamaattumillu tusarniaanerit, allakkatigut tusarniaanerit ingerlanneqartarnerat ilanngullugu, pisortaqarfiup suliassariuassallugit.

---

UPA 2002/16  
APNP J.nr. 64.00.01